



Kualiti udara semakin pulih, tiada titik panas dikesan dalam negara

Oleh Mohamed Farid Noh - Oktober 21, 2023 @ 3:52pm
farid_noh@bh.com.my

ISKANDAR PUTERI: Bacaan Indeks Pencemaran Udara (IPU) di negara ini menunjukkan kualiti udara semakin baik dengan tiada stesen merekodkan bacaan tidak sihat hari ini.

Ketua Pengarah Alam Sekitar, Datuk Wan Abdul Latiff Wan Jaffar, berkata sebanyak 26 stesen di seluruh negara mencatatkan status kualiti udara pada tahap baik.

Beliau berkata 42 lagi stesen mencatatkan status kualiti udara pada tahap sederhana setakat jam 11 pagi tadi.

Beliau berkata, berdasarkan laporan ASEAN Specialised Meteorological Centre (ASMC) yang berpusat di Singapura, tiada titik panas (hotspot) dikesan di dalam negara.

"Imej satelit National Oceanic and Atmospheric Administration (NOAA) menunjukkan terdapat 23 titik panas dikesan di Sumatera dan 22 titik panas di Kalimantan, Indonesia tetapi tiada titik panas di dalam negara dikesan.

"Peta Jerebu Serantau yang dikeluarkan oleh ASMC semalam juga menunjukkan taburan titik panas dan keadaan berjerebu semakin berkurangan di Kalimantan dan Sumatera disebabkan hujan di sebahagian besar kawasan ASEAN Selatan dalam beberapa hari ini.

"Pelan Tindakan Jerebu Kebangsaan (PTJK) akan sentiasa memantau kualiti udara dari semasa ke semasa bagi memastikan NRECC dan agensi-agensi terlibat dengan pengurusan bencana jerebu dapat bertindak dengan lebih cepat dan responsif," katanya.

Beliau berkata demikian pada sidang media selepas pelancaran Sambutan Hari Alam Sekitar Peringkat Kebangsaan, di Hutan Bandar Majlis Bandaraya Iskandar Puteri (MBIP) di sini, hari ini.

Terdahulu, perasmian Sambutan Hari Alam Sekitar Peringkat Kebangsaan disempurnakan Permaisuri Johor, Raja Zarith Sofiah Sultan Idris.

Hadir sama, Menteri Sumber Asli, Alam Sekitar dan Perubahan Iklim, Nik Nazmi Nik Ahmad dan Menteri Besar, Datuk Onn Hafiz Ghazi.

Dalam pada itu, Wan Abdul Latiff turut mengingatkan orang ramai khususnya pemilik tanah supaya tidak melakukan pembakaran terbuka yang boleh menyebabkan berlaku pencemaran udara serta jerebu setempat.

Katanya, Jabatan Alam Sekitar (JAS) juga sentiasa melaksanakan tindakan penguatkuasaan dan aktiviti rondaan harian ke kawasan yang berpotensi berlakunya aktiviti pembakaran terbuka.

"Semua pemilik tanah disarankan memantau secara rapi kawasan yang mudah dan sering terbakar. Sekiranya disabitkan dengan kesalahan melakukan pembakaran terbuka, mereka boleh didenda tidak melebihi RM500,000 atau penjara tidak melebihi lima tahun atau kedua-duanya sekali.

"Mereka juga boleh dikenakan kompaun maksimum sebanyak RM2,000 atas setiap kesalahan seperti yang termaktub dalam Seksyen 29(A), Akta Kualiti Alam Sekeliling 1974," katanya.

Beliau berkata, JAS komited dalam menangani sebarang isu berhubung pencemaran dan menyeru orang awam untuk melaporkan sebarang aktiviti mencemarkan alam sekitar di talian bebas tol 1-800-88-2727 yang beroperasi 24 jam sehari atau e-mel ke aduan_k@doe.gov.my melalui portal e-aduan JAS di <https://eaduan.doe.gov.my>.